

Thursday, September 24, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

MNYF :

MNF thalaiin tunhnaiah Mizoramah tualthahna leh tharum thawhna a thlen fo laiin Home Minister Pu K. Sapdanga'n mipuite thlamuanna thuchhuah a sawi ngai lo an ti a, Chief Minister Pu Lalduhoma'n a department chan pahnih a chhuhsak tawh hnuah Home Department thleng chhuhsak a tum leh vang em ni tih zawhna an zawt.

MNYF chuan vawiin khan Aizawl Press Club-ah thuthar thehdarhtute kawmin, tunhnaiah Mizoram hmun hrang hrangah ruihhlo a zalenin, tualthahna, rukrukna leh tharum thawhna a thleng zing hle an ti a. Hei hian ZPM kaihhruai Mizoram Sawrkar chuan dan leh thupek kenkawhna kawngah a hlawhchham takzet tih a lantir a, chu chuan dan pawisak lohna leh Dan pal zutna a hring chhuak nasa in, Mizoram chhungah tharum thawh zawnga pawl khawihna a hluar phah a, Mizo mipuite chu mahni ram chhungah ngei an him ta lo niin an sawi a ni.

MNYF chuan Mizoramah tualthahna leh chhiatna a thlen fo laia Zoram mipuite thlamuan tura Home Minister thu leh hla hriat tur a awm lo chu an dem takzet tih sawiin, Home Minister chu a Department chanah thuneihna a la nei a nih ngai chuan Zoram mipuite thlamuanna thuchah neiturin an phut tih an sawi a. Home Minister ngawih reng lai hian Chief Minister chu Home Minister hmakhalh leh lar khalh tum ni awm taka a thu leh hla hmuh tur a tam hle thung an ti a. Home Minister ngawih reng na chhan chu Chief minister in a department chan pahnih a chhuhsak tawh a, a tum thumna atan Home Department thleng chhuhsak a tum leh ta em ni tih zawhna an zawt a ni. Hei bakah hian MNYF chuan Mizoram rorelna sang ber Assembly House ah Chief Minister berin Mizoram Police chungchang mawi lo taka a sawi khân Mizoram Police-te phurna a tihnam nasa hle ah an ngai tih an sawi a, khatianga Mizoram rorelna sang ber Assembly House meuh a thu a chhakchhuak duh ta mai kha a mak in Mizoram Police-te hotu lu ber Home Minister chu mahni hna pawh tlin lo leh Minister chak lo tak anga tlâng hriata lantir a duh vang zawk a ni em tih zawhna an zawt bawk a ni.



TOURIST:

Kumin January thla atanga August thla inkar khan Mizoramah khualzin mi 9,71,343 an lo zin tawh a, an zinga 11,087 te chu ramdang mi an ni.

Tourism Department in a chhinchhiah danin, January thla kha kumina khualzin tam ber tum niin, khualzin nuai 1, sing 2, sang 1,580 an awm a. August thla kha khualzin tlem ber tum niin khualzin sing 6, sang 2, 821 an awm a ni.

Kumina ramdang mi Mizorama rawn zin zingah Myanmar mi tam berin, mi sang 8,213 an rawn zin a, USA-in dawtin mi 773 an rawn zin a ni.



AIZAWL DC FECILITATES:

Kum 7 chhung Aizawl Treasury Square leh a chhehvela chhum lo chat lova ruihhlo leh sual rem theih nana lo duty tawh mi 15 te chu vawiin khan Azawl District Bawrsap Pu Lalhriatpuian kawmin, an inpekna an ngaihhlutzia lantir nan chawimawina thuziak pein, duty te thingpui inna tur sum a hlan bawk.

Pu Lalhriatpuia chuan tunhnaiah Mizoram dung leh vangah ruihhlo a hluar em em a, a dona kawngah nasa taka tanho a tul hle a ti a. Ruihhlo do kawngah Venghlui Paho Zing Duty chuan kum sarih chhung hma an lakna te an lo hriatin ropui an ti hle a, an inpekna avangin nasa takin ruihhlo hluar zel tur pawh tihremin a awm a beisei a ti.

Venghlui Paho chuan duty hi July ni 27, 2019 atanga an lo kalpui tawh thu te, a tirah chuan welfare leh Section ang tein hma an la tan a, tunah chuan Branch YMA-a OB nilai leh Ex-OB te nen Paho ten mahni thahnemngaihna atangin an kalpui mek tih an sawi. Venghlui Paho chuan an hmalakna DC in a hlutsaka a, a hriatpui chu lawmawm an ti hle, tih an sawi a. DC hnenah Treasury Square leh a chhehvel a lo him zawk theih nana thurawn an neih te an thlen bawk a ni.



CIJWS :

Vairengte a Counter Insurgency and Jungle Warfare school te chuan nihnih awh “Cultural Diplomacy “ zirhona seminar nimin atang khan an buatsaih a , He zirho naah hian University Professor hrang hrang sawm niin NIT Silchar leh Assam University zirlai ten an telpui bawk a ni.

Zirhonaah hian Mizoram University atangin Dr B. Lalzarliana leh Dr HK Laldinpui Fente te pawn hun hmangin mizo hnam leh mizo te dinhmun kal khawm te hnenah zirtirna an pe ani.

He zirhona in a tum ber chu India hmarchhak state hrang hrang leh hnam hrang hrang te nundan leh kalphung zirho anih bakah tun aia nasa zawk a in unauna tha neih zel theih dan tur sawiho ani.



DELHI CABINET APPROVES DURGA SCHEME :

Delhi sorkar chuan Delhi khawpui chhung a hmeichhiate leh transgender-te an him zawkna atan, a bik a duan auto rickshaw 1300 a service tir dawn.

Delhi sorkar hian he an hmalakna hi a hmingah Durga scheme tih phuahin, hmeichhia leh transgender-te pual hian electric hmang chi electric auto hman a nih dawn bakah, rawng sen no kah vek tur a tih a ni a. He Durga scheme hnuai a auto rickhaw 1300 zinga 1170 chu hmeichhia te tan a duan niin, a bak 130 chu transgender-ten an hmang thei bawk ang.

Delhi Chief Minister, Rekha Gupta chuan, heng Durga scheme hnuai a auto rickshaw hman turte hi a neitu leh a khaltu atan hmeichhia leh transgender te'n chanpual an nei dawn tih sawiin, Delhi revenue district tinah, electric auto 90 chu hmeichhe tan a tih a ni thu leh, a bak 10 chu transgender te tan a neih leh khalh theih a nih tur thu a sawi bawk a ni.

